

الفاجومي

## حكاية السفاح

- في كل صلاة كان السجناء يدعو للسفاح بالافراج..  
وحكمهم مصر
- بعد هروب السفاح.. كنا في عنبر «ب» بنتابع أخباره  
باعتجاب وحماس
- ليلة مات السفاح برصاص البوليس بات السجناء كل  
«حزين»



oboeikan.com

محمود أمين سليمان.. فى أواخر الخمسينيات انتشر الاسم ده فى مصر مقرون بالإعجاب أكثر من أسماء أم كلثوم وعبد الناصر وتيتو ونهرو ونكروما وعبد الحليم حافظ.. وبلغ من تعاطف الناس معاه إنه بدأ يتحول إلى بطل شعبى شبيه بأدهم الشرقاوى على عكس ما صورته الصحف المصریه اللی كانت بتقدمه فى هذه الأثناء فى صورته بعبع مخيف متعطش للدم الإنسانى.. أى دم!

عبد الناصر بجلالة قدره اتكلم عنه فى أحد خطاباته السياسيه وحذر الناس من الافتتان بيه.. ويمكن ده هو اللی دفع أديب مصر الأعظم نجيب محفوظ إنه يكتب عنه واحده من أهم وأجمل رواياته.. اللص والكلاب.. أنا شفت محمود أمين سليمان - وعشقتة - وعرفت حكايته.

قابله الأول فى حبسخانه محكمه عابدين.

كنا نازلين نجدد أمر حبس أنا ويوسف شريكى فى القضية ومحمود صبره ابن خالته شريكنا الثالث.

كانوا الأهالى بيحيوا الأكل والسجاير من شباك الحبسخانه اللی كانت تحت مستوى الأرض.

وكانت مرات يوسف جايه لنا أكل وسجاير وواقفه ع الشباك مستنيه دورها وكان فيه مسجون شاغل الشباك لمده طويله واحنا خايفين تيجى عربيه الترحيلات وتاخذنا ع السجن قبل نا نلحق ناخذ الأكل.

وضاعت توسلات يوسف فى صريخ المسجون اللی ع الشباك.. أنا سمعته يقول:

- أبويا يا نوال.. أنا سايب لك مصارى تكفيكى لو اتحكم على بتأييده.. حتى أبويا فى عينيكى يا نوال.. ويا ويلك لو فرطتى فى أبويا فهمانه يا نوال؟

قررت مساعده يوسف فاتجهت للشباك وزغدته فى ضهره فالتفت لى.. غريبه..  
لقيته شكلى بالظبط وكأنا توأم.. حاجه واحده اللى بتميزه عنى وحمه سودا جنب  
دقته.. قلت له:

- يا عم خلصنا بقى عايزين ناخد حاجتنا زيك.

رد على بابتسامه ودوده:

- ما تخافش يا بلدينا.. أنا اللى ح اجيب لك حاجتك.

لمحت نوال اللى كان بيكلمها كانت زى البطه مليانه بصحه وقصيره جبتين  
وجمالها متوسط ولونها يميل للبياض.

قال لها:

- معلىش روحى إنتى وتعاليلي هنا بكره.

وبعدين سألتى:

- ناسك اسمهم إيه؟

قال له يوسف:

- قول فين يوسف عبد القادر؟

زعلق:

- فين جماعه يوسف عبد القادر؟

ونزل من ع الشباك العالى برشاقه وشبك إديه وشال عليهم يوسف وطلعه ع  
الشباك وبعدين ابتسم لى وخدنى من إيدى فى اتجاه بطاينه مفروشه فى الحبسخانه  
وقعدنا.

سألتى:

- تاكل؟

قلت له:

- لا.

قال لي:

- تحشش؟

قلت له:

- يا ريت.

فوراً طلع من جيبيه باكو الكبش «دخان فرط» ودفتر البفره وحتة حشيش تجي نص وقبه وبدأ يلف بسرعه ومهاره ودخل على بأول سيجاره وقال لي:

- دي نكح بيها.. إنت جاي في إيه؟

قلت له:

- تزوير.

قال لي:

- زورت إيه؟

قلت له:

- استمارات قماش.

ضحك وقال لي:

- يا خبيتك.

قلت له:

- أمال إنت جاي في إيه؟

قال لي:

- ح احكى لك فى السجن لما أدوشك.. إنت فى دور كام؟

قلت له:

- فى دور أربعه أوضه تلاته.

- لو عَرت أى حاجه أنا قصادك فى أوضه ستاشر دور أربعه.. إنده قول يا محمود.. وفى العنبر عرفت حكايته من طقطق لسلامو عليكو.

هو زى أى شاب ضاقت بيه سبل المعاش فى الصعيد.. ركب رجليه وعلى اسكندريه.. وفى إسكندريه اتعرف على معلم هجام علمه أصول الصنعه قبل ما يسافر على بيروت اللي قعد فيها حوالى سبع سنين ورجع منها بمجموعه مفردات من العاميه اللبنايه ومبلغ كبير مكنه من إنه يشتري شقه فى إسكندريه ويتجوز نوال عبد العظيم وبعد ما استقر فى اسكندريه.. بدأ يمارس نشاطه على تقيل.. يعنى ما يكسرش شقه ع الساجد.. يعنى على عماه.. لازم يكون فيه ناضورجى.. شغاله.. بواب.. مكوجى.. سباك.. وماكانش بيسرق إلا ماخف حمله وغلى تمه.. مجوهرات وقلوس ونجف ومن أشهر عملياته سرقة بالطو المطربه أم كلثوم من عربيتها وهى بتغنى حفلتها الشهرية فى مسرح حديقه الأزكيه.. الصحافه أيامها قدرت سعر الباطو للمسروق بـ ثلاثين ألف جنيه!

نوال مراته كان لها أخ.. يعنى حرامى نتن.. خايب اسمه محمد عبد العظيم.. فشله دفعه أولاً لإدمان القمار ودا فى رأى محمود ماكانش مشكل لكن المشكل بالنسبة لمحمود بدأ يوم ما عرف إن محمد نسيه بيشتغل مرشد مع البوليس.. طار صوابه وهدد نوال بالطلاق إذا سمحت لأخوها بدخول البيت.

- خير ربنا كتير يا نوال.. إبعثى لأخوكى اللي يكفيه وزياده.. لكن دخوله البيت فيه خطر علينا.. فهمانه يا نوال؟

على الجانب الآخر كان جواز محمود من نوال عبد العظيم مصدر فخر لمحمد عبد العظيم بين زملائه الهفافين والمرشدين.. كل كام يوم يلم الصحبه ويدخل بيها

على نوال ياكلوا ويشربوا الشاي وياخدوا فلوس كمان فى غياب صاحب البيت.  
وكانت نوال كل ما تحاول تلفت نظر أخوها يهددها بالإرشاد عن محمود وحسبه  
فتحط همها فى قلبها وتسكت.

وفى يوم من ذات الأيام رجع محمود البيت بدرى لقى محمد عبد العظيم ورفاقه  
قاعدين فى الصالون بيدخنوا سجائر حشيش ويلعبوا قمار وساحبين البشل على  
بعض.. وهاج محمود فى نوال ومحمد وطرده الضيوف الكرام شر طرده بعد مازقهم  
على قفاهم واحد واحد.. وودع كل ضيف فيهم بشلوتين ع الباب.

قوم إنت يا عم محمد عبد العظيم ثور لكرامة قفوات وأرداف ضيوفك  
المرشدين.. وروح بلغ على محمود فى عدة قضايا.. وقوام قوام كان البوليس كابس  
شقة محمود ونوال وبالتحف الموجوده فى الشقه عملوله عدّه قضايا رحلوه بيها على  
مصر ثم عنبر ب بعد ما بلغ مجموع القضايا بما فيها قضيه بلطو أم كلثوم ثلاثين  
قضيه.

اخر محمود ما اتأخرش عن رد الجميل فاعترف على خمس قضايا تافهه جاب  
فيهم رجل محمد عبد العظيم.. وجابه معاه فى عنبر ب... لكن المدهش ف الأمر إنه  
كان بيعامله كويس جداً وكان مش مخليه محتاج حاجه ومره سألته:

- إنت إزاي بتعامل الشخص ده كده.. مش هو اللى حبسك؟

ضحك وقال لى:

- إنت عاشر واحد يسألنى السؤال ده.. يا اخواننا أنا مش جايه السجن عقوبه  
ولا انتقام.. أنا جايه هنا عشان أحمى مراتى وبيتى منه!

آفه المسجون الحقيقه هى التخزين داخل الزنزانه لا مشى ولا شمس ولا هوا!  
محمود أمين سليمان قدر بفلوسه وذكائه يفلت من التخزين ويتصنع فى صالون  
الحلاقه بعد ما دفع مبلغ للشاويش محمد عبد العظيم شاويش الصالون علاوه على  
إنه كان بينزل جلسات نيايه بشكل شبه يومى لتسديد الثلاثين قضيه.

وفجأه بدأت الشكوك تساوره من خلال تسويق المحامي وعدم حماسه لفكرة الإفراج عنه وحضور الجلسات من الخارج.

ويوم بعد يوم التحول الشك إلى يقين في وجود علاقة بين نوال والأستاذ المحامي.. وقرر الانتقام.

وذات ليلة سمعنا خبط ع الباب من أوضه ستاشر دور أربعه عنبر ب:

- يا افندى يا غفر الليل.. واحد بلع بشله.

واتصل غفر الليل بالطباط النوبتشي بسرعه على غير العاده وعلى غير العاده برضه حضر الطباط النوبتشي ومعاه التمرجى ونقلوا محمود على عنبر المستشفى والصبح رحلوه ع القصر العينى.

هو فى الحقيقه كان بالع ورقه مفضضه بتاعه عليه سجاير ودى بتظهر فى الأشعه وكأنها بشله ويسموها بالاصطلاح الطبى.. جسم غريب.

بعد كده سمعنا بهرب محمود من القصر العينى بعد ما سطل النفر جيبص اللى هو عسكري الحراسه بتاعه لحد ما عماه.. وبدأت سلسلة الحوادث والمطارده اللى ضخمتها الصحافه.. وكنا فى عنبر ب بتتابع أخباره بإعجاب وحماس وكأننا فى ملعب كوره حتى السجانه ماكانوش بيقدروا يخفوا إعجابهم وتعاطفهم مع محمود فى غيبة الطباط.. مره سألت الشويش عبد الغفار.. أقسى سجان قابلته فى مصلحه السجون:

- إنت صحيح يا عم عبد الغفار كنت بتدعى للسفاح إمبراح فى صلاه العصر؟

قال لى:

- إنت يا واد بتهلدىنى.. أيوه كنت بادعى له وح افضل ادعى له.. ماله محمود؟  
دا واد حنين وجدع.. وربنا بحق جاه النبى يخبيه من ولاد الكلب الظلمه دول.. وينصره عليهم.

وضحك أحمد فوزى حرامى الققط اللى هى الشنط الحرىمى وقال لعبد الغفار:

- يعنى لو ربنا نصر محمود عليهم.. الحراميه حيحكموا مصر يا عم عبد الغفار؟

ولأول مره أشوف عبد الغفار بيضحك وهو يقول:

- ما هم حاكمينها يا حمار!

وليله ما مات محمود أمين سليمان برصاص البوليس بات السجن كله حزين..

مساجين وشاويشيه وعساكر غفر الليل وغرق عنبر ب فى الحزن والصمت

والإحباط.. وصوت عم أحمد الشبراوى المجروح وهو بيغنى:

من فوق شواشى الجبل

أسمع نغم بالليل

غاب القمر م السما

بكيت نجوم الليل

نزلت دموعهم مطر

ع الكون

غرق فى الليل

آه يانا يانا يا وعدى

